

Air melimpah di beberapa lokasi

SABAK BERNAM - Beberapa benteng pertahanan ombak di daerah ini dilaporkan terjejas dan dilimpahi air berikutan fenomena air pasang besar pagi semalam.

Ketua Polis Daerah Sabak Bernam, Superintendan Nor Azmi Isa berkata, antara benteng ombak yang terjejas adalah di Kampung Sungai Air Tawar yang dilaporkan runtuh sepanjang kira-kira 100 meter.

"Selain itu, ban di Sungai Lang dilaporkan rebak di beberapa lokasi manakala ban di Sungai Apong dan Tebuk Mendeling dilaporkan dalam keadaan baik," katanya.

Katanya, berikutan paras air laut lebih tinggi daripada biasa, dikatakan air laut melepasi ban-ban ini seperti di Ban Sungai

Apong dengan ketinggian antara 15 hingga 20 sentimeter (cm).

"Ban yang pecah telah dibaiki segera oleh pihak Jabatan Pengairan Selangor (JPS) dan kerja-kerja itu dijangka siap pada jam 5 petang sebelum air laut pasang semula," katanya.

Menurut Nor Azmi yang juga Komander Operasi Pengurusan Bencana Daerah, beberapa kawasan telah dinaiki air seperti di Pantai Batu 23, Sungai Nibong, air memenuhi dataran dan dua kedai sedalam kira-kira 25 cm.

"Di Dataran Rekreasi Bagan Nakhoda Omar (BNO) ditenggelami air sedalam 15 cm, manakala di lima rumah di Kampung Nelayan BNO turut terjejas dengan air setinggi 10 cm," katanya.